

榆次縣志卷之八

人物傳上

才品

三國魏

孫資字彥龍太原中都人博覽傳經講業太學同郡王允見而奇之歷縣令魏武爲司空辟之會兄爲鄉人所害資手及報讎乃將家屬避地河東尋復爲本郡所命以疾辭友人河東賈逵勸應命乃往應之署功曹舉計吏尚書令荀彧嘆曰北州承喪亂已久謂其賢智零落今日乃復見孫計君乎表留爲尚書郎辭還尋參丞相軍事魏初轉右丞特命爲中書令加給

事中賜爵關中侯與劉放並掌機密晉關內侯明帝初尤見寵任加散騎常侍晉樂陽亭侯漢諸葛亮出南鄭時議大發兵資曰昔武帝征南鄭取張魯陽平之役危而後濟又自往拔出夏侯淵軍數言南鄭直爲天獄中斜谷道爲五百里石穴耳爲其深險喜出淵軍之辭也又武帝聖於用兵察蜀賊棲於山巖視吳虜竄於江湖皆撓而避之不責將士之力不爭一朝之忿誠所謂見勝而戰知難而退也今若進軍就南鄭討亮道旣險阻計用精兵又轉運鎮守南方四州遏禦水賊凡用十五六萬人必當復更有所發興

天下騷動費力廣大此誠宜深慮夫守戰之方力役參倍但以今日見兵分命大將據諸要險威足以震懾強寇鎮靜疆場將士虎睡百姓無事數年之間中國日盛吳蜀二虜必自罷弊乃止時間吳孫綺舉兵議因此伐之資曰鄱陽宗人前後數有舉義者眾弱謀淺旋輒乖散昔文皇嘗密論賊形勢言洞浦殺萬人得舡千萬數日間舡人復會江陵被圍厯月權裁以千數百兵住東門而其土地無解散者是有法禁上下相奉持之明驗也以此推綺懼未能爲權腹心大疾也綺果敗太和末吳遣周賀浮海招誘公孫淵

上欲邀討之朝議多以爲不可惟資決行策果大敗之晉左鄉侯烏丸校尉田豫至馬邑故城軻比能帥三萬騎圍之上問資對曰上谷太守閻志柔弟也爲比能素所歸信令馳詔使說比能可不勞師而自解矣從之比能果釋豫而還加侍中光祿大夫時內圖禦寇外規廟勝資皆管之然自以受腹心常讓事於上朝臣會議擇其善者推成之衆人有譴過輒爲請解征東將軍滿寵涼州刺史徐邈並被譖資皆盛陳素行卒使得保其功名者資力也初資鄉人司空掾田豫梁相宗豔皆妒害資而揚豐黨豫構造謗端資

終無恨意豫等遂結爲婚姻資曰吾無憾心不知所
釋此爲卿自薄之卿自厚之耳乃爲長子宏取其女
及田豫老疾又致其子於本郡以爲孝廉揚豐子後
爲尚方吏將致法資請活之其不念舊惡如此景初
二年封中都侯薦武衛將軍曹爽代燕王宇輔政請
速召太尉司馬宣王齊王初增邑三百並前千戶封
愛子一人亭侯次子騎都尉餘子皆郎中正始元年
加右光祿大夫金章紫綬儀同三司六年轉衛將軍
領令如故七年復封子一人亭侯年老遜位以列侯
朝朔望位特進曹爽遇害復爲侍中領中書令嘉平

二年復遜位就拜驃騎將軍轉侍中特進如故三年卒諡貞子宏嗣資蒞官勤慎自修優於放然皆多將順抑辛毘而助王思至密陳損益亦多裨焉咸熙中以資著勲前朝改封宏離石子

按三國史孫資本合劉放傳其稱太原孫資者史止著其郡略縣不書往往多此例褚志人物首孫楚而不及資亦未考資即楚祖錄楚而遺資何也

郝昭字伯道太原人爲人雄壯少爲部曲督數有戰功爲雜號將軍鎮河西十餘年民夷畏服蜀諸葛亮圍陳倉使昭鄉人靳詳遙說之昭於樓上應曰魏家科

法卿所練也我之爲人卿所知也我受國恩多而門戶重卿無可言者但有必死耳卿還謝諸葛便可攻也詳以昭語告亮亮又使詳重說昭昭曰前言已定我識卿耳箭不識也詳乃去亮起雲梯衝車以臨城昭以火箭逆射雲梯梯然梯上人皆燒死又以繩連石磨壓衝車衝連折亮乃更爲井闌百尺以射城中以土瓦填塹欲直攀城昭又於內築重牆亮又爲地突欲踊出於城裏昭又於城內穿地橫截之晝夜相攻拒二十餘日亮無計救至引退上嘉昭善守賜爵列侯及還引見慰勞之顧謂中書令孫資曰卿鄉里

乃有爾曹快人爲將均如此朕復何憂欲大用之會
卒遺命薄葬

晉

孫楚字子荆太原中都人也祖資魏驃騎將軍父宏南
陽太守楚才藻卓絕爽邁不羣多所陵傲缺鄉曲之
譽年四十餘始參鎮東軍事文帝遣符邵孫郁使吳
將軍石苞令楚作書遺孫皓邵等至吳不敢爲通楚
後遷佐著作郎復參石苞驃騎軍事楚旣負其材氣
頗侮易於苞初至長揖曰天子命我參卿軍事因此
而嫌隙遂構苞奏楚與吳人孫世山共訕毀時政楚

亦抗表自理紛紜經年事未判又與鄉人郭奔忿爭
武帝雖不顯明其罪然以少賤受責遂湮廢積年初
參軍不敬府主楚旣輕苞遂制施敬自楚始也征西
將軍扶風王駿與楚舊好起爲參軍轉梁令遷衛將
軍司馬時龍見武庫井中羣臣將上賀楚上言勸帝
舉遺佚惠帝初爲馮翊太守太康三年卒初楚與同
郡王濟友善濟爲本州大中正訪問銓邑人品狀至
楚濟曰此人非卿所能目吾自爲之乃狀楚曰天才
英博亮拔不羣楚少時欲隱居謂濟曰嘗欲枕石漱
流誤云漱石枕流濟曰流非可枕石非可漱楚曰所

以枕流欲洗其耳所以漱石欲厲其齒楚少所推服
惟雅敬濟初楚除婦服作詩以示濟濟曰未知文生
於情情生於文覽之悽然增伉儷之重三子眾洵纂
惟洵子盛纂子統綽並知名

按榆次亦爲古中都地府志楚傳直云榆次人今
仍作中都者與下張偉傳並尊史文之舊不輒改
也省志以楚入文苑傳而云平遙人或恐失之

孫統字承公楚孫幼與弟綽及從弟盛過江誕任不羈
而善屬文人以爲有楚風征北將軍褚裒聞其名命
爲參軍辭不就僑居會稽性好山水乃求爲鄞邑後

爲餘姚令卒子騰嗣以博學著稱位至廷尉弟登少善明理注老子行於世仕至尚書郎

褚志楚後有孫統孫綽等傳省府二志亦然錢志以爲永嘉渡江久居南服安得濫引故不錄統綽等惟盛十歲始避難過江因錄之然考晉書孫統傳幼與綽及從弟盛過江則統綽皆長於盛豈不嘗與盛同居故里乎今列統於楚傳後而別以綽冠文學之首似爲允當

孫盛字安國父洵潁川太守在郡被害盛年十歲避難渡江及長博學善言名理盛常詣殷浩談論對食奮

擲塵尾毛悉落飯中食冷而復暖者數四盛著醫卜
及易象妙於見形論浩等竟無以難之由是遂知名
起家佐著作郎以家貧親老求爲小邑出補瀏陽令
太守陶侃請爲參軍庾亮代侃引爲征西主簿參軍
時丞相王導執政亮以元舅居外南蠻校尉陶稱讒
搆其間導亮頗懷疑貳盛竊諫亮曰王公神情朗達
常有世外之懷豈肯爲凡人事邪此必邪佞之徒欲
間內外耳亮納之會桓溫伐蜀盛爲參軍軍至彭模
溫自以輕兵入蜀盛領羸老輜重在後賊數千忽至
眾皆惶遽盛部分諸將並力拒之應時敗走蜀平賜

爵安懷縣侯以平洛功進封吳昌縣侯出補長沙太守嘗因從事至郡與桓溫賤而辭旨放蕩稱州遣從事觀採風聲進無威服來儀之美退無鷹鷂搏擊之用徘徊湘川將爲怪鳥溫得賤重其才名竟捨而不罪累遷秘書監加給事中年七十二卒盛篤學不倦自少至老手不釋卷著魏氏春秋晉陽秋數十卷晉陽秋詞直而理正桓溫見之怒謂盛子曰枋頭誠爲失利何至乃如尊君所言若此史遂行自是關君門戶事其子拜謝請改時盛年老家居性方嚴有軌憲雖子孫班白而庭誨愈峻至是諸子號泣請爲百口

計盛怒不許諸子遂私改之然盛已寫寄慕容儁矣
子潛放潛字齊田任豫章太守放字齊莊庾亮嘗稱
之曰王輔嗣弗過也終長沙相盛曾孫康少貧嘗映
雪讀書官至御史大夫康子伯騎位終驃騎將軍

北魏

張偉字仲業小名翠螭太原中都人也高祖敏晉秘書
監偉學通諸經講授鄉里受業者常數百人勤於教
訓雖有頑固不曉偉告諭殷勤曾無愠色常依附經
義教以孝悌門人感其仁化事之如父性恬平不以
言誇其操清雅篤慎非法不言世祖時與高允等俱

被辟命拜中書博士轉侍郎大將軍安樂王範從事
中郎馮翊太守還仍爲中書侍郎本國大中正使酒
泉慰勞沮渠還遷散騎侍郎聘江南還拜給事中建
威將軍賜爵成臯子出爲平東將軍營州刺史進爵
建安公卒贈征南將軍并州刺史謚曰康在州郡以
仁德爲先不任刑罰清身率下宰守不敢爲非

郭祚字季祐太原晉陽人魏車騎將軍淮弟亮之後也
祖逸并州別駕前後以二女妻司徒崔浩太武時拜
徐州刺史假檢校侯贈光祿大夫父洪之緣坐浩事
祚少孤貧涉歷經史習崔浩書工尺牘文章弱冠爲

州主簿刺史委之書記孝文初舉秀才對策上第拜
中書博士轉中書侍郎李冲薦之遷尚書左丞兼給
事黃門侍郎清勤在公夙夜匪懈帝甚賞之從南征
還晉黃門以贊遷洛賜爵東光子遷散騎常侍仍領
黃門與黃門宋弁參謀帷幄隨其才用各有委寄嘗
夕飲清徽後園孝文舉觴賜祚曰郭祚憂勤庶事獨
不欺我不勸此人當勸誰也從南討兼侍中拜尚書
進爵爲伯嚮武初兼吏部尚書時詔姦吏逃刑兄弟
代之祚奏曰若以姦吏逃竄徙其兄弟罪人妻子復
應徙之此則一人之罪禍傾二室臣謂罪人旣逃止

徙妻子走者之身懸名永配於情不逸姦途自塞從
之尋正吏部持身潔清重惜官位銓授必徘徊久之
下筆即云此人便已貴矣量才稱職時以此歸之出
爲使持節鎮北將軍瀛州刺史轉鎮東將軍青州刺
史逢歲饑多所賑卹士女懷其德澤入爲侍中金紫
光祿大夫并州大中正遷尚書右僕射與侍中黃門
參議刊正新令故事令僕中丞騶唱入宮門至於馬
道祚以爲非盡敬之宜言於帝納之騶唱不入宮自
此始也詔領太子少師尋加散騎常侍詔營明堂國
學祚奏曰今雲羅西舉開納岷蜀戎旗東指鎮靖淮

荆漢沔之間復須防捍徵兵發畝所在殷廣邊郊多壘烽驛未息不可於師旅之際興版築之工且獻歲云暨東作將始臣愚謂宜待豐靖之年因子來之力不時而就從之宣武每賞賚祚多至百餘萬又特賜劍杖恩寵甚深遷左僕射梁將康絢邊淮將灌揚徐祚表曰蕭衍狂狡擅斷川瀆役苦人勞危亡已兆宜敕揚州選一猛將遣當州之兵令赴浮山表裏夾攻從之除使持節散騎常侍都督雍州刺史征西將軍時領軍于忠情寵驕恣祚心惡之遣子太尉從事申郎景尚說高陽王雍令出忠爲州忌聞而大怒矯詔

殺祚祚達於政事凡所經履咸爲稱職每有決斷多爲故事名器旣重時望亦深一朝非罪見害遠近莫不惋惜靈太后臨朝使弔慰追復伯爵正光中贈使持節車騎將軍儀同三司雍州刺史謚文貞

按北魏真君九年省榆次入晉陽縣至景明元年始復郭祚正當省縣時故史稱晉陽人

郝軒太原人世名知人嘗稱清河崔元伯王佐之才代所未有也符堅亡元伯避難齊魯軒嘆曰斯人而遇斯時不因扶搖之勢而與鸚雀飛沈豈不惜哉元伯後果仕魏爲天部大人配饗太祖廟庭軒位至散騎

梅子墨志 卷八
常侍黃門侍郎

唐

辛異者本衛人代以豪俠著聞隋文帝時常避仇徙榆次有大姓鞠氏見而奇之知其當富貴遂妻以女異常致貲累萬值大業末人飢異出穀數千賑施邑中妻鞠氏亦廣大常謂異曰天下方亂丈夫不因時取功名甘坐鄉里乎異曰吾心也顧未見可適者乃去謁楊元感決其無成復歸太原既而唐高祖義兵起遂挺身從焉高祖軍用不足異悉毀其產以資行師武德中累功爲千牛衛將軍時突厥爲邊患使異爲

夏州刺史禦之與虜數戰勝異在夏州政有惠愛遷

雲中都督年七十卒

採辛氏事跡

石義奮世幽州人父昭立爲儒生天寶末安祿山反昭

立惡居叛亂地挈家走京師爲賊將所追家人被殺

惟昭立與義奮得亡脫奔太原昭立往來教授數年

買田結茅於洞渦之側遂爲榆次人義奮善書疏能

挽強擊劍常遊河北朱滔客之時滔將悖逆以義奮

有才謀欲引居腹心義奮知滔不臣常正色謂滔曰

自古無亂臣賊子能全身家者公自視與安氏如何

安氏負恩肯德甘蹈兇逆未幾誅夷天下醜恨公必

毋循其轍終身為唐臣不獨富貴延子孫且免後世唾矣滔怒囚之未及殺守者哀其義陰使逃去變姓名為王武俊小吏久之武俊覺焉武俊故陽結滔持兩端呼義奮試問今日事義奮為陳古忠臣與奸逆究竟勸速絕滔表其罪武俊雖不能用然意已為所感動及李抱真結武俊使奉天子武俊卒聽約義奮後自岐山尉歷官比部郎中

採唐穆質小史

宋

夏守贇字子美守恩弟幼召入襄王宮稍長習通文字真宗初授右侍禁命往綏夏伺察李繼遷遷西頭供

俸官寄班祇候幸大名爲駕前走馬承受時康保裔
戰沒部曲畏誅言保裔降賊守贄受密詔變服往廉
得其情還奏詔卹其家移承受真定路幸澶淵汾陰
皆爲駕前巡檢遷綾錦副使幸亳州修行宮轉崇儀
使提舉倉草場甚見親信遷西上閣門使提舉諸司
庫務以右千牛衛大將軍昭州刺史爲樞密都承旨
兼領三班院每遼使至與楊崇勳迭爲館伴凡十餘
年擢侍衛親軍殿前步軍都虞候改馬軍并代州都
總管累遷步軍馬軍殿前副都指揮使建武鎮東保
大軍節度使除殿前都指揮使徙節定國又徙鎮海

罷管軍踰年徙定州路都總管寶元二年召知樞密院事上問西事守贇言宜併小障兵以據衝要伺便邀擊功或可成上然之辨劉平石元孫之枉自請將兵擊賊換宣徽南院使陝西馬步軍都總管兼經歷安撫緣邊招討使命以御劍隨之尋詔駐軍河中居數月徙屯鄜州康定元年召同知樞密院事以子隨卒請罷以宣徽南院使天平軍節度連判瀛州二州復爲眞定府定州等路都總管徙高陽關判瀛州卒贈太尉諡忠僖

高若訥字敏之并州榆次人僑衛州進士及第補彰德

軍節度推官改秘書省著作佐郎再遷太常博士御
史知雜楊偕薦監察御史裏行遷尚書主客員外郎
殿中侍御史裏行改左司諫同管勾國子監遷起居
舍人知諫院范仲淹奪職歐陽修移書責之未幾加
直史館以刑部員外郎兼侍御史大慶殿設祈福道
場言大慶殿非禮不御非法服不坐國之路寢也豈
可聚老釋爲瀆慢又言二府對纜數刻何以盡萬幾
宜賜坐從容如唐延英故事擢天章閣侍制知永興
軍留判吏部流內銓出爲河東路都轉運使召還兼
侍讀權判尚書刑部母服除加龍圖閣直學士史館

修撰以右諫議大夫權御史中丞時宰相賈昌朝與
參知政事吳育數爭事明年旱言陰陽不和責在宰
相洪範大臣不肅則雨不時若昌朝及育皆罷若訥
代育爲樞密副使王則據貝州或議招降言河朔眾
兵所積今釋不討且啓亂階後果城破皇祐五年罷
觀文殿學士兼翰林院侍讀學士尚書左丞卒贈右
僕射謚文莊若訥強學善記自秦漢以來諸傳記無
不該通尤喜申韓管子書明歷學通醫書雖國醫皆
屈服

按若訥奏貶歐陽修在宋時不爲正論所與然文

潞公作神道碑則又稱其人故載之

薛傲本太原榆次人從其父客汴父沒遂留汴宣和靖
康間金人敗盟南侵朝廷將割三鎮傲聞之感憤上
狀政府力言不可夫國家有三鎮猶室有垣墉人有
股肱也安有自去其股肱垣墉而尚能存全者哉又
切詆執政誤國徐處仁李邦彥等大怒使開封尹逐
之傲因去之河東又往陝西金人犯陝傲以策干王
庶庶不用乃結陝子弟聚保延安山谷中金將婁室
屢攻之傲築土寨甚堅不能拔益團練鄉勇召號西
北尚義者至數萬人欲取金所奪州縣歸宋會張浚

之敗陝西五路盡沒於金傲知事不可成帥三千騎
奔吳玠於蜀玠爲奏朝廷授一官傲屢爲玠言陝西
山川曲折及金人可破之略時方與金和傲悒悒不
得伸棄官入青城山終其身不出

孫靖康忠義傳

金

趙益太原人讀書肄業元兵入鳩合土豪保聚山峽屢
戰有功晉陽公郭文振署壽陽令駐兵榆次重原寨
遂率眾收復太原夜登城斬馘甚眾獲老幼二萬餘
口馬仗不可計陞太原治中復擢同知府事兼招撫
使元光元年八月元兵攻城急益知不可支乃焚府

庫殺妻子沈符印於井遂自殺贈銀青榮祿大夫河
東北路宣撫使仍求其子孫

故國遺忠錄作太原府榆次縣人又云元兵入城
益帥壯士巷戰自焚死與史微不同

元

杜質字文美中杜里人資性嚴重博學雅量冠冕士流
雖一吟一詠之間莫不包括道義激勸風化一時人
士咸雅重之歷仕翰林院編修江北燕南兩道廉司
經歷江南諸道監察御史

明

孫榮字士華孟家井里人少好學篤志儒者之業雖家貧食或不足而榮宴然處之不以寒窶屑意中景泰癸酉舉人授陝西華州訓導改官麟遊教諭既登仕恒以祿不追親爲恨終身弗飲酒食肉也其天性純摯雖古江革朱百年之徒無多讓者方爲教諭時上書陳時政不便者四幾及於禍而不悔云榮所著詩文有竹溪集若干卷藏於家

孫昌字文昌南關二里人少爲文以博敏稱天順己卯舉鄉試選知陝西涇州未幾有薦之者調知商州商州經盜賊後倉廩皆空庠校衰息昌力振刷之去侵

漁節浮費由是府儲漸充官用咸裕乃新學宮及講舍之傾敝者日進諸生教之商州人士興起自昌始初州民張姓者常與鄰王乙有隙他日有四僧過商假宿張氏明日去王乙遂告郡守謂張殺二僧圖其資陰取他屍爲證郡守不察以爲然竟坐張當死獄具連坐者六人已誣服矣會昌至請於郡守更訊之呼張等六人至視口此非殺人者且六人殺人而所謀止七金又無贓非疑獄耶有枉第自言吾爲汝辨囚久困鍛鍊不敢自明但引服如故昌引六人中少年者使盡言少年泣曰四僧行時其三人不知所之

其一爲黃師自言過商陝買藥去歸靈寶朱陽寺中
今尚當在彼若遣人問之二僧存亡可得知也昌即
捕黃師至具得僧狀非六人所殺卒抵告者罪而六
人竟白一郡稱神明秩滿民詣闕請留詔加四品服
復任三年後再知沂州治如在商時昌素耿勁不能
奉上官上官欲齟齬之昌遂致仕歸杜門不出篤於
孝友父沒事後母加謹與諸弟雍雍然其在商州也
有二人自他所負販來者時流民之禁方嚴郡守獲
二人以屬州將論戍昌曰彼負販以求衣食非流亡
無賴者昔人有言殺人媚人吾不爲也爲力請於郡

竟得釋商州人爲立德政碑祀鄉賢

郝毅字致遠郝都里人初爲諸生以苦節自勵人未之知也天順己卯中鄉科選官得陝西鞏昌府通判鞏昌民負氣好訟方下車訴牒紛集毅坐堂上視之剖決如流郡吏皆畏服私相謂彼書生初入仕乃能如此毅以鞏昌邊郡士少文學躬自教課久之諸生彬彬然毅爲人貌樸中無城府而性特剛正有持執毀譽無所動處事寬平人以是稱爲長者毅罷官時年方壯盛絕無復仕意有南趙別墅屏居其中耕桑以供伏臘淡然自樂不入城市者五十年至九十餘

狀貌猶未衰見者嘆其異沒後祀鄉賢

任義字時中在城一里人少有才名通經史年方冠與孫昌郝毅同薦於鄉未即舉進士即授同知河南南陽府事南陽大郡號難理義到官治之有條郡吏久蠹政前守不能革者連數人矣義盡剔其弊一朝悉除去之南陽人爭相歌舞同知專任清軍義因上便宜五事並申機要兵部善其法遂取爲例使天下清軍者倣行之是時汝鄧大饑義慮流民且至先度地爲屋發粟以待賑已而流亡者果大集恃以全活多至萬餘人南陽安靜勿擾皆義力也上官知義才且

賢咸爲加禮會有息之者爲蜚語欲中傷之義太息
曰吾以直道自任今阻於奸邪可以止矣乃告歸家
居日與郡諸生講學門下受業者百人縣令高其風
以時致敬凡政事有不達者則造而咨焉然義未嘗
一往謁也及卒門下生因其自號稱之曰五雲先生

祀鄉賢

郭曦字景暘南要里人自幼性謹厚不事俗飾而有雍
容之度及長以舉人任河南新蔡知縣其政和易恥
以矜察矯立聲譽新蔡之人甚樂之縣值歲荒曦計
畫聚粟萬石賑卹饑者民賴以濟鄰縣有長湖屯其

屯人素梗難治大吏以事屬曦持檄往按之長湖人
習聞曦有柔善名謂爲懦不足憚梗悍如故曦按治
之悉抵於法縣境肅然自是無敢爲惡者秩滿因新
蔡請許復留一年遷開州同知去新蔡人爲立石縣
中以頌其美時流賊攻掠郡縣且至開州曦召父老
子弟鼓以忠義使共禦賊賊解去以功擢通判河南
府後改通判山東濟南府致仕其卒也壽尤高云祀

鄉賢

寇恭字敬之在城一里人少爲諸生與弟儉並有名邑
中稱曰二寇恭天資甚敏於書一見輒能誦而孝友

仁厚有古君子長者風或竊其物者已捕得之公蹙然曰此特迫於饑寒耳竟釋使去常約鄉人以朔望行禮於社而相勸爲善其後鄉人效之遂以成俗生平不喜華飾雖晚以子天敘貴累封副都御史而沖約自如早工文聲振場屋然久之始以貢爲定州判官判官職卑冗恭爲之有惠於民及歸未嘗以家人生業爲務儉字約之年二十始折節讀書遂登進士授大理評事未五十而歿士論爭惜焉儉子天與恭加撫愛而教使成立亦舉進士出戶部郎出知東昌府時稱其有理劇才寇氏自儉天與及恭子天敘天

敘子陽前後登進士爲邑中門第之尤盛者恭儉俱
祀鄉賢

寇天敘字子惇方五歲時母病久髮不櫛家人欲剪焉
天敘泣曰是不可毀傷也比母卒哀毀已能如成人
十二通文詞舉正德戊辰進士授南京大理評事有
豪家殺人論罪當死欲以僕代天敘執不可竟抵於
法遷知浙江甯波府府有馮氏兄弟號二虎者橫暴
爲民患苦天敘論正其罪歲饑民乏食天敘白部使
者使賦糧米者得以銀代省而易輸人稱便焉再遷
應天府丞時武廟駐驛南都提督江彬怙寵恣威公

卿多屈已下之天敘獨與抗禮或諷天敘賂彬天敘曰與賂彬以毀節宵怒彬而得禍彬聞之怒甚使人陰伺天敘竟無所得訖不能傷有勸當往謝彬天敘終不聽未幾世宗改元擢都御史巡撫宣府改撫鄖陽又改撫甘肅方到鎮回夷數千騎犯山丹天敘遣將擊斬其酋及部落三十六級甘肅故邊徼諸司多蕩壞法紀太監總兵者役軍薙草輸供私秣凡官給軍值則勒奪之天敘乃令軍交草於官官交值於軍毋令旁落由是爲奸利者不得逞初土魯番掠甘肅朝廷閉關絕其貢使至是復請通貢市而其詞頗嫚

天敘議曰土魯番勢不能不有求於我彼敢慢其詞者將謂我不能戰耳若乘其怠擊之必勝勝而後許則威德兩全矣又知督府方傳檄責土魯番天敘移書止之中所言皆洞切事要頃之西域有貢獅子牛狗者天敘奏郤之進右副都御史巡撫陝西值北番寇固原天敘調兵禦之斬首三百有奇捷聞賜白金文綺詔書褒異擢刑部侍郎復擢兵部侍郎雲中之兵變也天敘方屬疾聞之力疏上言叛軍怙惡罪不可赦毋姑息以滋後患因條具方略朝廷嘉納焉無何病卒明史有傳天敘性廉儉然養親祀先必從其

至訓其子陽常令疏食澣服砥礪士行同邑周鈇稱
天敘忠信純篤而厚於稭倫謂正明敏而盡乎物理
同時若馬聖呂棹崔鏡皆於天敘有神明金玉之喻
其爲名流所推服如此所著有涂水集陽舉嘉靖己
丑進士知廣平縣陞禮部郎擢浙江僉事歷官江西
按察使浙江右布政以不附嚴嵩罷歸其操行潔廉
世稱能繼天敘而守其家法云父子俱祀鄉賢

李應時訓導寶子由舉人仕陝西泰安知縣復知河南
盧氏縣所至有清白稱其在盧氏也臺使者表其治
行爲申州第一陞同知轉趙王長史仕宦三十年歸

無餘物嚴靜自守足跡不至公府士論咸重之

周鈇字汝威張慶里人鈍軒其號也早通羣經爲縣諸生遇試當食廩以讓其友學使者許論奇之嘉靖丙戌成進士官行人奉使代濟二王所比歸王及諸司有所覬鈇謝卻之轉湖廣道監察御史以憂去服闋授河南道御史時有議征安南者鈇力言其不可事遂止已而巡按陝西陝西涇陽故有秦時鄭國渠自漢以後開廢不常而民失其利鈇至延問父老得其要領遂復開之民田受溉者數萬頃自塞外用兵邊人被擄逃歸者邊將多殺以冒功鈇請下詔嚴禁之

報可改按山東風力尤著尚書鄭曉稱爲眞御史山東適大旱地盡赤鉄爲文禱焉一夕而雨浹時以爲誠直所感還朝改右春坊清紀郎未任以疾告歸嘉靖辛丑俺答自大同入遂犯太原至榆次列帳城下鉄慷慨登陴以勵守者鉄前爲御史時常上章劾尚書林廷楫張瓚張雲而論嚴嵩貪鄙奸邪語尤切直聲動朝右及是疾愈赴官因俺答爲邊患復疏陳守禦大計當事惡之謫廬州府知事稍遷國子丞再陞吏部文選主事嚴嵩已深恨鉄然猶屬鉄私事鉄峻絕嵩嵩益怒諷長吏部者出鉄通判河間府旋復陞

南京吏部考功主事嵩怒不已託以遷轉太驟黜鉄爲民鉄歸而怡然常跨蹇驢往來墟里中家雖甚貧不顧也卒年五十有傳附明史稿王與齡傳所著有鈍軒文集梓行穆宗元年詔錄前時諸言事得罪者於是尚書楊博御史龐尚鵬等二十九人合疏言鉄孤忠苦節與楊爵等相同乃復鉄官加贈光祿少卿鉄歿而賢鉄者舉天順中河東薛瑄故事祀鉄於學宮鄉賢

閻樸字文甫使趙里人少讀書目數行下墳籍多所究覽嘉靖壬辰進士選爲庶吉士授翰林檢討官初選

山西通志 河間縣志 大統子 陳北守 日請
復河屋下九條會議樞先戶日理事者有
成算令內國散兵舍而虛深入府底終
有踴躍為軍至四議上得免連奉京國
子張祭酒也、館諸生嚴試、仍領南、
且曰休者立志當以聖賢為準聖賢一
誠其本五倫其末、德之行、其其日
如蘭、五旬忽眉、旨以赴任、連限勤、
閱往、歸、集、小、圖、云、云、

庶吉士也世宗疑有倖進者命復試之至再而樸皆
第一大學士李公見其文歎曰天下士也為檢討三
年詔於史館校錄五經東宮既立晉右春坊右贊善
假歸值辛丑之變俺答薄城城中驚譁樸與鄉士大
夫登城督隸卒與有司共守虜有一人健甚徑趨城
下樸募善射者一矢殪之於是解圍去既而還官主
京兆解試所取多有名晉南京國子祭酒到官僅兩
月有詔使罷去樸闢小園結屋數楹列琴書其中嘯
詠自娛樸繼母李性峭急能事以婉順有同年死京
邸者厚為之殮而歸其櫬里人趙從善被誣坐囚十

餘年又有盜某以仇誣引他人者官拷無完膚樸知其枉皆白脫之所著通鑑逸旨榆次志山西通志稿及詩文集共若干篇

張崇翰輯明倫彙考卷之四十一
嘉靖元年己酉科舉善詞樸與順天御試

褚鈇字民威東白一里人嘉靖乙丑進士爲河間令河間多巨姓大猾鈇布治從容法行蠹去三年績甚著遷監察御史初入臺值元旦日食鈇陳六事以諫旋出按陝西茶馬時韓王與太僕爭牧馬場陰賄鈇爲援鈇堅謝之力言祖宗制不可更主無以奪北虜方受款而時時侵掠屬番鈇上疏言番部河西之屏障也被侵急則折而入於虜虜內狙中國外兼番倍地

而無後患他日跳踉必大爲秦隴憂乞禁之便時以爲未然後二十年虜合寇甘州固原河湟大震卒如鈇料云鈇巡按河南風紀整肅周趙諸王戚屬多爲民害者鈇奏而懲之擢大理寺丞晉少卿再遷右僉都御史巡撫河南奏免逋稅九萬有奇萬歷壬辰甯夏亂廷臣交薦鈇有文武才可任經畧會事平乃用鈇爲工部侍郎改刑部侍郎有以言事獲罪者神宗將置之極刑鈇執奏罪不當死其人終得免歷右都御史晉戶部尚書以治漕功加太子少保賜璽書金帛時內外多故鈇深以根本爲憂上疏陳時政急務

語盡切不報鈇乃乞休鈇居里中雖賤且少者皆與
言笑如平生懽不自矜其貴儉約奉已而賙施無倦
所著有從政錄從政續錄梓行子應于初以舉人任
河南原武令有卓政晉河間司李民稱不冤 國初
膺薦邊才擢湖廣僉事尋以疾歸順治五年值姜瓖
之亂佐邑宰守城有功父子俱祀鄉賢

李敏字鈍甫南關三里人嘉靖丁未進士選庶常授刑
科給事時北虜犯京保定楊中丞提兵勤王捍禦甚
力以忤中官被逮敏抗疏救之世宗怒廷杖敏且令
吏部勿與遷官已而世宗亦悟乃遷禮科復爲刑科

左給事河東鹽法止課鹽池而太原所產舊未嘗禁
巡鹽御史請禁之敏上言曰太原一郡不毛之地大
半民取土瀝鹽以供稅若並鹽而禁之稅將安出哉
事乃得止至今人便之遷刑科都給事中世宗末年

崇尚長生術羣臣多進香希寵敏獨否以此復廷杖
然敏守直如故久之擢順天府丞改大理少卿由太

僕正晉順天府尹自陳歸里處林泉間十餘年卒祀

鄉賢

山西通志卷之九十五 敏字融南自陝州里鄉得子原潤別墅于原年卒楊侯為撰墓志

王冠字元甫在城一里人嘉靖丙午舉人連試禮部不
第乃就吏部選任河南鹿邑令邑境稱盜藪有渠魁

聚眾爲人害且將謀亂冠設方畧悉擒之縣吏多舞
文者前令勿能治冠剗斥其蠹政者竟就清肅邑城
故土築大雨輒崩冠爲易之以甄邑東南地卑常積
淫潦爲棄壤冠使縣人濬鑿爲渠因得瀦水資灌溉
人以為利凡冠在官以治狀被旌薦者三十有六擢
陝西靜甯州未幾卒鹿邑爲之立祠

張國儒字翼真孟家井里人萬歷戊戌進士官行人轉
刑科給事陞都諫掌兵科戒子弟曰貪弁債帥多營
求若受其私禮非吾志也汝輩切勿然外轉遼東參
政凡七上疏辭不赴著有二垣疏草皆森嚴剴切人

不敢言者卒於家郡縣俱祀鄉賢

科行入張國傑青州試

三十七年己酉科

寇化在城一里人萬歷乙卯舉人丙辰會試副榜官萊州同知以孤城當敵兵數萬城守卒完擢本府知府以憂歸不復仕

齊人奇塘子萬歷乙卯舉人由山東青州府推官陞保定同知以才幹氣節調天津僉事加四品服蒞事精明持躬廉介卒於家姪孫世恩以歲貢任襄垣訓導張九河字宗禹別號傲竝王胡里人少端重如成人長爲縣生員益勵廉隅人稱張夫子邑令知其賢延爲子師以九河貧屢諷關說他事九河毅然不屑萬歷

戊子舉於鄉非公事不至縣庭邑令史記事嘗曰吾於張孝廉求一揖之不可得也况其他乎知河南汜水縣縣人德之上官捕盜欲株連平民九河力請得免遂相忤降爲順天府照磨補大冶令不能與人委曲乃拂衣歸九河內行純篤教其子甚嚴子養萬曆丙辰進士由中書舍人官御史著禮記纂言初養中鄉舉爲新衣服之九河見而怒責使長跪竟日親戚爲謝過乃已養之入官也負重望魏忠賢用事欲召致門下不應他日忠賢出道其門徑入將見之養輒

避去養家居甚得里黨之譽傳稱至今養曾孫天保

少有至性家甚貧事親尤篤父病天保借乘羸馬市藥他所值涂水漲發馬不肯渡天保以需藥方急鞭馬直前冒險取藥以還或赴鄉里飲必懷肉食果餌歸以啖母曰吾不能具甘旨藉是以奉老人後舉進士爲鞏縣令縣有冤獄久不得平反天保至立讞其枉蒞政敏幹邑大治尋調蘭陽令擢刑部主事改授吏部遷考功郎記名御史未幾引疾告歸卒於家天保旣貴杜門不預外事儉約如爲諸生時九河養俱祀鄉賢養竝祀府鄉賢

左應選字六語在城二里人天啓辛酉舉人初入禮闈

會目疾即策蹇歸有止之者應選曰吾數不得售也
其恬退如此後授昌黎令值遼東用兵所向披靡應
選獨保孤城悉力守禦親自登陬者四十餘日以不
次功擢薊州僉事時宜興當國以枉法事屬應選應
選不爲屈宜興銜之嗾巡方中以他事遂被逮適司
李湯閑遠召對爲奏於上應選僅得免謫戍汾州鼎
革後旋榆次家徒四壁或勸之仕應選不屑也年八
十四終於家

王臣要村人明崇禎間以歲貢任河南考城縣訓導李
自成之亂鄰郡縣俱陷沒兵至考城縣令與士民遯

山中臣獨守孤城被執不屈遂遇害時到任甫兩月
國朝乾隆四十三年里人進士王綏猷採考城縣志以
紀其事

國朝

桑芸字笈雲在城人少貧借書讀之即不忘善爲文爲
明提學僉事袁繼咸所賞崇禎庚辰進士順治初官
行人擢貴州道御史巡按直隸時當大亂後民多逃
徙芸見道上嬰兒遺棄者百餘人惻然曰誰非赤子
而令失所若此出俸金覓人乳養之多賴以活民有
所疾苦即以章聞因有所不便觸勢要者謫爲浙江

幕官起大理寺正轉光祿少卿外補河南參政墾荒地數千頃以業貧民有白福德者久爲奸猾芸廉得之將寘於法一夕有求見者以重貲爲福德請芸揮之出即取福德杖殺焉遷廣西按察司使抵桂林守兵方虐民芸力爲繩禁有重獄累歲不決芸悉以理斷結之遷河南右布政使未幾再爲廣東左布政使赴官道病卒崇祀府縣鄉賢祠

諭祭二次康熙二十八年奉

旨入忠義祠

魏震使趙里人順治己丑進士授府谷縣行取爲刑部

曹郎出知山東濟南府小心清潔每事必親決不以
假人弟寔少與震俱有名以拔貢任廣東高州府通
判撫養窮黎結狴獬以恩信於鋒刃之下活無辜三
千餘人

韓焯魏岳村人以舉人任山陽令二年告歸風素自如
任卹鄉里多感其惠公舉鄉飲大賓年七十餘卒初
焯爲諸生時邑令劉星雅重之待有加禮及星去焯
絕足不至縣門

王介石字豫二南關人性高邁寡嗜好生平未嘗與人
爭少喜讀書比壯益究經史旁及釋老之學皆有所

論說太原徵君傅山高世士也見介石而悅之賦詩以贈而定交焉介石任平遙滎河司訓以古文教諸生有郭生者常忤令令以短於學使者會使者至郭甚恐因密懷金夜至介石所欲求爲援介石默不應郭私念已必危心恨介石已而使者無斥郭生意郭始知其陰全已然而介石終不自言後數年司諭廣昌廣昌邊地士習喬野介石寬以誘之使其長子執爨與諸生共相講論士多嚮學久之遷河南桐柏令疾作不之官卒於家

李如蘭字長芳鳴李村人徙居陽曲以貢授澤州訓導

例改主簿奏對稱

旨超擢高郵州知州居九月陞紹興府知府調江甯府知府
江甯人民稠雜豪猾爲奸如蘭命捕之杖殺數人而
將軍所轄兵素囂悍如蘭豫請於將軍一繩以法陞
江南廬鳳道晉四川按察使所至察吏安民悉心籌
畫自懷遠至壽州湖港交通久爲盜藪往往借捕魚
爲業搶劫行旅如蘭廉得其實戮渠魁數人而自某
地至某地若干船皆有編號又復增塘汛立保甲盜
患遂息成都華陽爲四川附省縣舊責以領銀納米
給兵餉百姓苦之如蘭言於巡撫與外州縣均而民

困以甦乾隆八年轉江西按察使甫蒞事值歲祲流
民數萬集會城如蘭請截漕十萬賑之全活甚眾及
其去也百姓扶老攜幼哭送於道晉四川布政使卒
子天培辛未進士廣西左江道永祺甲子舉人四川
松茂道孫履謙廣西潯州府知府

採府志

張在字孝侯鳴謙人性木訥不苟言笑由廩貢援例銓
朔平訓導庚午舉於鄉俸滿保薦知縣選直隸甯靜
縣遇災賑濟悉心稽察民沾實惠後調任雄縣甯靜
士民爲建祠立石焉雄有大狷呂三猴久橫鄉里下
車後即置於法遠近悅服邑有堤工民踴躍趨功不

日歲事時鄰邑亦興工上憲檄派雄邑助役在以民
力未復不堪重困縷述情形爲民祈請制軍方恪公
謂方伯廉使曰閱張令詳稟令人動爲民父母之思
後陞景州州爲畿輔門戶郵傳絡繹向係民間按月
出馬在捐俸買馬以應役不使累民值夏旱設壇於
二十里外徒步往禱適有星使過境見之因入奏

溫旨獎諭陞順天北路同知丁艱服闋補河南河捕同知旋

陞山東曹州府知府至會垣方伯孫公曰耳君清名
久矣蒞任半載以督工防河得疾遂不起子毓豐膺
乾隆辛卯鄉薦任芮城縣訓導

原敬德字仲明源渦人性至孝七歲遭母喪哀毀如成人父崇漢爲邑廩貢生教之讀甚聰穎年十七補弟子員旋食廩中乾隆壬午鄉舉壬辰大挑以知縣分發四川試令資陽三月而治制軍因民請留展期一年去之日民攀轅臥轍車不得前乘夜去百姓爲立長生位以祀後補南川大計擢薦川省第一陞山東甯海州知州以解甘餉望悞左遷陝西整屋令調署綏德州回任後卒於署敬德爲人精勤幹練風格廉峻而紳士愛民如恐不及尤善治盜其任甯海也地濱海多盜發輒亡入海兵役莫能緝敬德悉心邏察

備知其窩頓出入處由是盜息素廉慎當罷官時囊
無長物僑居州城州民爭致柴米及其卒也關中兩
邑號泣赴弔喪還之日遠近泣送者不絕於道仲子
光鶴以鑾儀衛經歷沒於王事蒙 恩廕襲叔光鶚
以歲貢援例試用訓導季光鷺優廩生早卒俱有文
名爲時人所推許

郝文光字志山號橫橋大東關人幼隨父宦浙江多材
藝捷南宮後筮仕河南初任泌陽遇疑獄旬日即決
一邑稱神明後宰虞城修古虞書院捐俸千金爲東
脩膏火資調繁祀縣興社學立義倉及養濟院育嬰

堂所以嘉惠士民者無不舉大府知其賢能調祥符
首邑行省公事悉倚以辦保薦以同知直隸州陞用
補浙川廳同知調署光州任虞城時前令虧帑萬金
杞縣則前任虧至數萬顧念貧不能支慨然任之代
爲補苴榆邑議起書院膏火捐金三百爲眾倡其尚
義輕財類如是告歸後囊橐蕭然講學鳳鳴書院時
勉多士以立品爲先素工漢隸尺幅片楮人皆珍惜
壽至八十三而終

王燕堂字蘭圃在城人國賓曾孫弱冠成進士選入庶
常散館授直隸廣平縣令署通州雖少年蒞事而興

利剔弊親土愛民一以實心制軍那文毅公特深器重調繁鉅鹿因公望悞開復後簡發浙江歷署臨海慈谿海鹽題補仁和視在直隸時更爲諳練丁內艱回里時士民走送數十里臨江酌水方之劉寵服闋仍赴浙適海上用兵上憲以紹興爲甯郡門戶特任之坊堵險要供應軍需三載毫無遺悞劉玉坡中丞應詔保薦賢員

召對稱

旨未及回任途次授廣東南澳同知旋陞潮州府署惠潮道遷廣州府遭父喪起復簡授四川雅州府遷成都署

川南道歷官數十年所至有聲粵東蜀西俱爲首郡
太守行省決大疑定大讞無不贊佐其間人皆服其
精敏云

閻慶元字春亭使趙村人家貧嗜學自少以廉潔自勵
與邑人王蘭圃楊翰華同學又同鄉試榜道光乙未
成進士分發甘肅知縣補清澗縣在官有清名而不
炫才不邀譽第以恤民爲心陞甯夏知縣甯夏稱繁
劇邑慶元以簡馭繁民乃不擾邑有巨猾悍婦之好
訟者必嚴責之使不爲害善良境內肅然上憲知其

廉能奏陞靜甯州知州送部

引見自京回籍獲疾遂不起人皆憫其有志而業未竟焉
楊毓藻字翰華使趙村人弱冠爲諸生膺道光辛巳

恩科鄉薦甲辰大挑二等銓猗氏教諭非其志也閏嘗留
心民社恒以未得操刀爲恨咸豐乙卯以截取長江
西零都縣江右自癸丑後賊匪縱橫零都復與閩界
毗連更多不靖人皆爲藻難之藻毫無畏縮意乃偕
族弟毓森胞姪倬與依數人就道行李蕭然猶寒氊
也抵省後奉飭赴任便道至贛州府謁太守二姪以
不習水土先後病亡因寄棺於贛適有同鄉在贛者
欲公藉經營二姪喪事稽留郡城以觀動靜公毅然

曰事不避難臣之分也吾第盡吾分而已他何知焉
乃徑抵勞視事甫兩月而賊黨萬人由吉安竄至矣
時城中練勇僅數百居民千餘家藻激以大義人皆
死守賊用地雷陷城丈餘蜂擁而入藻率民勇奮擊
斃者無算賊逸出越十餘日賊益厲至四面攻擊城
陷公猶巷戰力竭遇害從難者族弟毓森幕友浙江
童鑑洪洞襄桐車夫閻映和家僕段成等以及城中
之壯勇老弱無一屈者事

聞奉部議卹襲雲騎尉世職以旌其忠長子實爲郡庠生
早卒次子侃以文弱書生一間公難存身孤往尋覓

遺骸往返數千里流離顛沛備歷艱辛招父魂並堂
兄倬與依之喪以歸

樞次縣志

卷八

榆次縣志卷之九

人物傳下

孝友
隱逸

義行
僑寓

文學
仙釋

武畧

孝友

唐

馮秀誠王士吳皆縣人也事母孝兩人母病亟秀誠士吳並割股和藥以飲之疾漸愈時令狐楚爲河東節度使太原尹表其事於朝稱秀誠士吳或生在草茅或長於市井忘甚痛於已軀期有瘳於親疾可以感神明變風俗宜與旌揚以崇善類詔表兩人門

明

趙復性邑諸生父玉卒復性號泣不食數殞絕及葬廬於墓側草棲露宿者三年過客爲之酸感族人毀其廬強載以歸知縣崔岑狀於朝旌其孝行

周文德御史銜之父也生而靜重不妄言笑父歿事母及祖母曲致孝養弟早亡撫遺孤如己子既長爲置產授室姪感化而父事焉爲人排難解紛暮夜風雨無所避有以死罪誣人者文德爲力白於官得釋邑令聞其賢請爲賓飲於鄉文德年既高人知其素行皆望而敬之祀鄉賢

金申夫天性純孝弱冠時父鼎得危疾申夫割股和湯

以進疾遂瘳中夫善書能文中正德丁卯舉人仕由工部郎出知鞏昌府有惠政祀鄉賢

閻大綸以貢生爲安吉州訓導調容城教諭善誨諸生少時父瓚疾亟大綸禱於神乞減已壽以益父算父疾旋愈兄大經性剛嚴大綸委曲承之怡怡如也邑人稱孝友者必曰育菴先生育菴大綸自號也

劉陽者邑白田村人嘉靖二十年陽生未晬時值虜患母棄陽山中而逃陽祖母王亦抱二歲女以逃聞陽啼聲乃棄女攜陽歸王寡居四十年陽事王朝夕定省及卒時時啼泣祭祀思慕不忘至萬厯中邑令表

其門

國朝

張運通明御史養子也養在明季以事下獄運通入犴
從左右奉侍又叩闕請以身代繫不許養禁獄中七
年甲申春李白成破京師始得出運通侍養歸榆次
已而賊敗西奔擄養等往關中運通隨養行瀕涉危
苦至商州猝遇虎虎不害也後養得放還旣歿運通
喪葬無違禮其事母尤篤焉初運通聘耿宗舜女未
娶宗舜官江西值金聲桓之亂隔絕者數年女已長
宗舜欲爲改字女堅不可卒待運通而婚焉後運通

置妾郝氏年十八甫二載而運通病篤召郝曰汝方
艾未有生育吾死惟所適郝流涕不答及運通卒郝
屏居幽室紡績自養者五十年人稱節孝萃於一門
霍夢蘭順德府同知俊士子也明崇禎甲申正月李自
成自秦入晉太原諸縣皆下賊署蕭恆爲僞令執諸
縉紳令出家財助軍不則加重拷俊士當出五千金
無以償夢蘭代父出應僞吏身受榜掠無完膚事方
急而李自成東破京師以五月敗歸夢蘭聞之因潛
奉父母出城亡匿山中已而賊至榆次蕭恆迎於郭
外城中人遂閉門守賊怒甚攻城城陷賊屠殺數千

人復遣兵四出搜逃亡者俊士與夢蘭俱被執獲賊遂以左應選張養及俊士等併其妻子繫往關中夢蘭在賊間辛苦奉父母行瀕危者屢矣賴賊僞吏周國明者保護之因以得免既至西安賊安置俊士等於商州商州久經殘破無人居夢蘭隨俊士行山谷閒其艱楚險毒倍甚於被俘入陝時然夢蘭左右挾持俊士卒無恙及王師平三秦乃與父並得釋歸當俊士之繫而西也其妻死賊中乃藁葬焉夢蘭既奉父歸復往陝招母魂以其喪還俊士卒合窆於墓蘭遭禍家破貧甚又早經酸苦以羸疾終常作天變錄

備述其事見者嘉傷焉

周昌運明御史鈇之後也早孤育於祖母及長事祖母甚篤以家貧去從商賈他日與其儕貿易京師忽心動曰祖母得母有疾乎遽行而歸果病且篤昌運與妻王氏共禱天神願以身代明日疾遂愈又二年其祖母復病臥床第者至十餘歲昌運與妻謹侍之未嘗少怠也及卒廬於墓三年乾隆初有司以狀聞並建坊旌其孝

寇鳳鳴家貧父靖好飲食又不能獨食每與鄰里釀錢共飲或互爲賓主鳳鳴常力作每夕必以百錢置枕

下終靖之世無間也知縣劉星表其門

張星煜儒家子謹於事父母母候病劇星煜截一指以血書佛經祈母速愈然侯竟死星煜慟幾絕頭鬚爲白事聞令建坊以旌

寇居仁邑諸生安肅令光裕子也性篤摯少而失恃事繼母田能盡誠敬田歿居喪如禮前令劉星行鄉飲禮舉爲賓

王瑩少有至性事父母能曲體其心訓弟變成鄉舉孝友之名溢於里閭前令劉星旌其門

柳應發鄉人也家貧親老傭力負販以供甘旨遇親病

呼天請代湯藥必嘗前令王亦宣給匾獎之

段繡鳳幼失父及長言及父則哭不已性公方以公論舉鄉賓勤於公事一十八年雍正中闔邑特薦爲農官壽至八十有五

王璽西長壽村人性樸摯少孤奉孀母無違志兄性最嚴事之惟謹母沒後析爨不擇所取食貧無怨言子夢熊爲諸生家雖貧而生事喪葬俱竭力以孝著後贈文林郎

王家賓阬西村人附貢生少失怙依繼母及長母病侍醫藥三月不解衣母終二載不飲酒茹葷焉人皆稱

贊之

梁惠儀南溝村農人與弟恕儀相友愛正室旁搆一小舍每食兄弟必俱弟病親煮湯藥晝夜不離嘗以祖塋狹隘議立新塋惠儀曰吾兄弟一生相依死安忍離及惠儀卒恕儀營葬並已壙亦成之而遷父葬焉尤篤於友誼太原某者惠儀舊交也後以道遠疎往來病甚謂其妻曰若衣食或不給榆次南溝村某吾友也往尋之必有濟妻後攜子來榆惠儀詢知其故淒然曰不料吾友已沒汝母子乃至此乎厚遺之歸後不時餽送卒使子成立又有戚某以婢贈惠儀時

偕弟出耕及暮歸見之惠儀曰吾農家安得有婢僕
爲義女擇婿嫁之其好義類如斯今其子爲諸生名
繼鱣

義行

元

鄭甫至正二年有詔旌高年耆碩之士時甫與弟勝並
以齒德爲鄉里所敬有司以名聞詔縣長吏表署如
式大書其門爲旌德云

許諒高年有行誼里人薰化其德至正癸巳詔旌其閭
明

宋鑑正統中縣饑鑑出穀二千一十石助有司賑恤長
吏以聞朝廷降勅曰勅山西太原府榆次縣民宋鑑
國家施仁養民爲首爾能出雜粟二千石用助賑濟

朕用嘉之今特賜勅獎諭勞以羊酒旌爲義民仍免
本戶雜泛差役四年尚克蹈忠厚表勵鄉俗用副朝
廷褒嘉之意正統六年正月初四日
于敏正統中輸財助官賑濟旌爲義民

鄭肅北趙村人景泰六年歲凶肅以雜粟六百餘石賑
恤貧民有司以狀聞朝廷勅旌其門曰冠帶義民鄭
肅之門至今有坊在

國朝

杜成常行道間拾遺金百兩訪其主歸焉則武弁武文
煌父也知縣金世楨旌之

郭全者性情厚少時娶妻張因多言出全自是便不復
娶人曰子年方壯宜娶也曰吾已有子矣勤業力田
及田事畢秋冬之間草木黃落往刈柴薪積之日以
爲常人曰何勞苦若是曰吾不敢自惰至風雪大寒
則召貧家無火者悉散與之又爲人賃傭取值當歲
荒全出數年儲值爲粥於路以食丐者鄉里有爭者
必邀父老共解止之康熙中以老壽終

辛一成餅師也本靜樂人僑於榆遂著籍焉一成爲餅
美人咸稱辛氏餅一日客有自遠歸而過市者入肆
擇餅擇已客讎直去一成復作餅見地上有襪而小

封甚固手之約十數金一成曰此買餅客之所遺也
輟業追之行四五里許以襍還客不問其姓名而歸
周道興御史鈇姪孫爲諸生有古豪傑風時值流寇縱
橫建白當事多方守禦邑人倚爲長城生平篤行誼
訓子瑋成進士由清苑令入爲刑部郎擢知順德府
其治行嘗列高第云祀鄉賢

郝銑由武生援例考授衛千總爲人慷慨好義邑人間
士魁得莊浪令貧不能赴任銑毅然資以千金及罷
歸貧無以償亦竟不索也有孿生者困貧病銑延之
於家而給以衣食及卒爲厚葬之所行事多類此凡

宗黨親戚婚喪不舉若貧乏者賑而卹之尤竭力云
張賦奇政奇兄弟俱好善遇貧者勿論親疎遠近皆多
方周卹之人或有急難則義形於色有相競者必勸
止之當二人在時其里中遂無訟者又數出貲財修
橋路人多感其德前爲縣令者厯加表揚

趙光文家饒於財而性特慷慨康熙六十年秋雨雹歲
饑光文出穀以賑又爲鄉人立學舍延師使遠近皆
來就學有張某者負人金不能償光文爲代還之其
他行多類此雍正中知縣鄒雙旌其門

鄭宗舜以耆老舉爲農官乾隆十二年捐義倉穀六十

石縣令給匾以旌

邢開運性慈良多善行於困貧尤喜周卹歲施棺木以予貧不能殮者凡橋梁道路開運以其貲力修葺之雖重費不惜也人知運好善困苦殘疾多往投之開運必有所濟年運八十餘

李鍾瑞東長壽人家貲饒裕凡買田屋不與人爭價曰吾念其貧不忍減也乾隆四十九年歲饑捐銀伍百兩買米賑濟至嘉慶十年又饑復捐伍百金散賑里人贈以匾額曰周急可風其子適與其孫豫順於道光年亦捐錢數百千以賑飢焉

于建業國學生龍田里人乾隆五十二年歲大歉建業
爲粥與餓者自冬至春全活甚眾

史必信史家莊人慷慨好義嘗捐千金擇地生息爲潤
族資凡族中窮苦老幼每月各給錢文冬季予以衣
死喪給以棺皆有常數由衛守備馳贈朝議大夫

胡光地字樹人懷仁里人父沒後與諸姪同居持家有
法不事姑息族中有不舉火者歲賜以粟不責償也
婚葬之事助以常數有窮老節婦三人爲之作傳且
伺其困乏而賙卹之乾隆壬寅別開河渠里人至今
利之嘗抵京師過深澤見至聖廟像露處招其里人

捐百金勸修葺之廟貌一新晚年營樓崖別業隱居
自樂不喜浮囂年近九十乃卒

左輔尉在城人歲貢生謙謹能讓敬兄尤無敢違人有
以家貧債迫欲賣婦以償者尉分修金爲平其債乃
得全又嘗有二人以悞考將除衣頂尉爲出貲曲成
之晚工書畫不務浮華殊有雅人深致

孫縉什貼人道光辛巳舉孝廉生有至性父疾甫三越
宿遽卽世縉呼號幾絕其母責以毀不危身大義乃
稍節哀葬祭悉依家禮至禫之日比御不入焉族人
有緩急輒推解不少吝嘉慶癸酉丁丑歲屢歉市米

昂貴斗值千錢有奇縉拚已粟差半減價以救荒已粟不給轉糶於市以繼之賠值斗數百錢縉不爲介意其好義類如此

劉觀錫字龍之在城一都人爲邑諸生肫謹無違禮父歿會母病因泣禱父墓次日即瘳嘗收租佃戶憐其貧貸之復給以錢偶行道中得遺襪舉之頗重知爲白鏹也坐而待少頃失者至即畀之叩姓名不告其婦家號素封予以數千金不受道光辛巳公舉孝廉方正人皆以爲無愧云

任學信下渦里人二十四歲失偶所遺一子賴兒嫂撫

育家頗小康不再娶勤儉和厚七十九歲卒鄉黨以義稱之子媳俱孝孫三人曾孫四人

楊騰鳳龍田里人偶適使趙村見古墳內有人將白經急解之問其故其人曰予因歉債無可償故至此鳳如數代償之人皆以爲善後其子大德以武庠生候銓都司友愛二弟大功大儒俱登武科孫遊庠者六
七人

王萬慶什貼南窰頭人開店宿舍一日有長白宣維藩投宿臨行匆猝遺數十金而去店中傭保得之以白於慶慶曰此必宿舍所遺勿私也乃靜候終日俟其

主來覓還之藩甚喜欲以金酬之慶辭不受此道光十二年事也

周順天張慶里人好義輕財有常姓者誼甚疎一日質衣物於典肆若欲泣者順天驚曰汝何故若是常曰有債相逼非止質衣且將鬻妻子耳順天即如數代償之其家室乃得全

常秉直車輜里人年近八旬其子德元欲以音樽爲父祝嘏秉直曰值此饑年糧價騰貴與其燕客一日曷若濟貧三冬於是捐米六十石所活甚眾里人匾其門曰德被桑梓

史珣史家莊人候銓道性體凝重厚以與人道光年歲饑出粟五十餘石以拯窮乏人藉以遂生者無算

王俊彥東聶村人捐職從九品敏於任事尤篤宗誼家不中貲值歲饑族中啼飢者數十家愀然曰吾力綿薄不能遍賙鄉黨忍令族人有餓死者乎乃糴粟以濟之計口眾寡按日給散貧者賴以全活焉後封

文林郎

王全坦車朝村人仁厚待人尤恤貧苦值冬大雪買羊皮衣一百二十件羊皮袴二十條以贈無衣者

道光十二年歲歉東長壽村候銓同知李貢候銓州同

胡天敘與姪胡建邦各捐錢二百千賑濟里人

道光十三年歲歉西白村貢生杜亦棠與本村人等勸家費稍裕者共捐數百金於朔望日按人給粟所活甚眾

道光二十七年永康鎮許慎修因涂水漲發里中廬舍多圯奉繼母王氏命開別院納里人男女數百口日給米粟若干斛

咸豐三年德音村郡庠生侯秉文與胞兄秉忠相友愛好施與因金河漲發里人壞廬舍者甚眾秉文請於兄開道南兩大宅處被災者且出粟數十石以賑焉

咸豐十年歲大荒南關附貢生王治泰舉意賑濟本鋪
既而病且革囑其子筆曰我沒必遂吾志及卒其子
遵遺命放賑三百餘石親族欲贈以匾辭之北田鎮
侯汝霖侯維礪捐米濟貧凡四閱月散給一千四百
餘石其堂弟維屏維烈咸助賑焉

禮義廉恥國之四維言義則禮與廉恥可知已榆
邑俗尙樸直好義之民間里不乏錄之以爲爲善
者勸至賑濟乃義行之一節而扶危救困慨然指
困所謂存心利物於物有濟者也烏得不書

文學

晉

孫綽字興公楚孫博學善爲文嘗作遂初天台等賦爲一時文士之冠領著作郎時大司馬桓溫將移都洛陽莫敢先諫綽乃上疏極陳利害尋轉廷尉卿

元

胡巨源登進士官高麗總管軍民府儒學教授博學多著述文譽蔚然

胡惟堯巨源子領鄉貢官晉甯路學正博雅工文詞名出巨源上

郭恭元貞間進士善大書飛動有神今學宮大成之殿
及羅漢堂額皆恭遺跡也

張欽登進士官太原路儒學教授善屬文論者稱其有
韓柳風士多宗慕之

明

侯世佑性豪曠有逸才爲文引筆立就所著有五倫評
詠諸集

金鼎字大器貌頎偉性寬裕喜怒不形成化間膺貢訓
導陝西之武功終日危坐齋室孜孜以訓諸生爲務
諸生亦無敢違其教者大器休休然忘己之爲卑官

也別號松軒所著有松軒集祀鄉賢

郭東皋以歲貢教授邑中言動不苟善事父母爲士論
推服門下從遊者甚眾多所成就時稱爲篤行君子
國朝

馬穎昌順治二年進士嗜學能詩文工草書其爲人簡
素宵靜已登第無裘馬僕從知山東霑化縣值土寇
難作穎昌死於亂

郝祺字介眉幼聰穎補博士弟子員每試皆第一名籍
甚壬午申副車辛卯登賢書癸巳成進士是時榆數
十年未有雋南宮者祺每出童叟聚觀遠近慕與交

而末嘗有驕色温温如寒士授湖南安仁令再爲廣西興安令罷歸不復交當世以經史自娛從學者列屋而居經其指授皆有師法登賢書雋南宮者踵相接尤好讀五代史當其得意不知寢食卒以是終鄉里稱長者

寇修己康熙庚子歲貢少好讀書至老不倦前邑令劉星延之主魏榆書院教弟子成就者五十餘人及卒門下生爲立碑墓上

王化隆歲貢生篤志嗜學動履必循規矩自幼至老手不釋卷從不干預外事門人從學者多掇巍科年八

十餘卒門人私謚靜學先生

趙紹宋楊盤里人府庠生家貧課徒爲業不計修脯勤於教督門下獲雋者二十餘人紹宋生平敦品績學文行兼優學校推爲師範年七十壽終

王糸字世甫南關人介石子也性沈靜嗜學在襁褓已能識星象十四學爲詩嘗夢登旂山臨涑水得水洗手根石骨冷之句覺而告其父其父曰是必以詩窮十五爲邑諸生頗立氣岸多否少可自號否否居士其父呵之曰孺子何敢然更命曰雌黑居士介石旣卒糸讀書於宛山精舍常數月不出邑富子辱兄仲

弗得直於令系直之令怒將中以危法是時大司馬高公其倬視晉學自其誣系遂從高公遊歲癸卯拔入成均充正藍旗教習丙午舉於鄉明年成進士任山東昌樂令弗得於監司改教職得大同府教授乾隆丙辰年以博學宏詞徵未入選後家居士之從遊者甚眾嘗主書院講席庚午

詔舉經學當事將復爲首薦弗應其爲學耄而益勤所著有左傳說桃蟲集南華從好楚詞章句若干卷至如程蘇二氏論五經諸說及答孫豕宰書俱有關學術政治辛未以疾卒於家二子愿中敏中

王呂識字再來號一心南關人介石孫系之姪也生有異質幼患痘目偏盲介石嘗曰此醜兒有奇氣遂取呂虔識王祥義以爲名呂識博覽羣書下筆千言立就詩歌駢體卓然成家五經歲讀必周尤深於易乾隆己酉中副車嘗厭家近囂乃奉母移居於縣北沙溝村刻苦自勵事母素謹教兩弟錫書錫蕃成名蓋其天性篤於孝友云其軼事見柳崖外編

胡豹變字蔚文號柳渠懷仁里人天才俊逸讀書過目成誦嘗受業於太谷任琚琚受業於博學鴻詞堇圃杭世駿以故學有淵源脫去恆徑鄉舉後兩上公車

不第遂絕意進取多置古籍沈潛子史百家凡所撰述得韓蘇氣息嘗自號浣花逸者作浣花逸者傳所著有柳渠文集其中如書城隍廟碑書泰山廟碑及思鳳亭跋駁石言解俱辨論有識不落窠臼又善書畫神超象外八十餘歲無病而逝面色如生人疑以爲羽化云其家居授徒多名下士如趙謙尊得其奧博王會圖得其腴潤胡孟康得其豪邁而其沈潛篤實得其輪困鬱勃之氣者則惟椿園胡體仁體仁賦性肫摯孝謹素著其爲學誨人一準諸柳渠故凡柳渠之文多珍藏之後任五臺教諭每丁祭必親滌祭

器尤重節烈亦嘗虔祀之其敦行不怠類如此

王用賓字客五西長壽里人少時負性剛直弱冠後篤志向學嘗潛心於王已山匯參講義及八集分編故其爲文也純而不雜三十餘歲失偶人或勸之娶用賓曰娶妻爲生子計耳吾既有子奚以娶爲且吾不忍以閨閣之情累吾骨肉也撫二子成立長藻亭成進士次萼亭膺選拔設教里中課徒最嚴入泮食餼者數十人人皆服其理解之真七十二歲食廩餼八十歲

恩賜副榜生平節儉而體強健不信岐黃嘗病痢其子孫

進以藥乃舉杯擲之於地曰爾毋庸壞我道行也九十餘歲乃卒

王廷倬字命侯要村人肫謹有守品潔行端平時講習一準程朱其爲文也必得真解而後即安雖不利名場不恤也生平衣冠必正瞻視必謹風雨寒暑其度不改人服其嚴整沒後邑人胡豹變誅辭有文品雙高并州第一之語其弟子李九儀同里人也學遵命侯矩步繩趨不踰尺寸於諸書能得理趣不涉浮詞一脈之傳師弟同揆命侯有病湯藥親進視之如父其師歿一切喪葬事俱爲經營有加禮人多躋之

郝揆字敘亭在城人進士禕之孫也性耿介不隨俗幼時讀書古柏臺感風濕遂病蹇乃取舊所讀書呻吟床蓐間數年始扶杖出門而已便便腹笥矣揆旣病廢不能治家人生產又父兄相繼逝數年母亦沒家中落於是志益堅行益勵治家教子必以嚴年三十餘或勸之試不得已應童子試而卒未售焉迺縱讀儒先書自小學近思錄及宋元諸儒緒論心解而力行之與陽直翰林張公廷鑑相知最深以理學相勸然議論有不合亦不苟同張以是益重之晚年子與妾俱亡家愈困人有贈以貲者卻弗受老益多病自

奉最儉嘗曰苟侈而用不繼將乞假於人何如儉薄
以養吾廉也其制行不苟如此

武畧

戰國

蓋聶榆次人善擊劍荆軻嘗遊過榆次與聶論劍聶怒而目之軻遂去

唐

郝忠字師榆次人曾祖上汾州司馬祖羅儒林郎代州雁門縣丞父穩明經文林郎褚志稱其文可經國武可濟時珪璋之器無玷無瑕敵愾之心有謀有勇官至昭武校尉上柱國壽七十有一卒

五代

侯章并州榆次人事後唐莊宗爲隊長明宗朝遷小校
晉開運末爲忠衛指揮使屯陝州爲內外馬步軍都
指揮使兼三城巡檢使與趙暉王宴謀斬遼將劉愿
送款於漢祖擢鎮國軍節度乾祐初加同平章事尋
移鎮邠州因擅其租賦乃矯奏貧民數千戶負稅租
願以已俸代詔褻之求副使趙彥鐸良馬不得誣殺
之俄加檢校太師周初加兼侍中廣順二年入朝請
開宴周祖謂左右曰諸侯來朝自當錫宴以申愷樂
豈侯其貢奉爲之耶命復賜之仍令有司自今藩鎮
有進奉者勿受俄賜宴廣政殿上壽復不納三年授

鄧州節度封申國公世宗初加兼中書令征壽陽命
爲攻城水砦都部署俄徙西北水砦再爲武勝軍節
度宋建隆元年八月授太子太師封楚國公旣罷節
鎮時有輕章者章厲聲曰當遼主謀歸有上書請避
暑嵩山者我麤人以戰鬪取富貴若此諛佞未嘗爲
之坐中有慚者乾德五年卒

宋

武行德榆次人身長九尺材貌奇偉家貧負薪遇晉祖
獵郊外見其所負倍常令力士更負皆不能舉高祖
奇之因留帳下天福初授奉國都校改控鶴指揮使

甯國軍都虞候契丹擾汴被獲行德僞請自效契丹
信之令率軍校載什物鎧甲送歸其國孥舟數十泝
汴至河陰相與潛謀曰我輩皆受國厚恩與其離鄉
井投邊塞曷若共守河陽俟敵兵退以圖富貴皆應
曰諾即共殺契丹監使分授器甲由汜水倍道抵河
陽契丹節度崔廷勳出兵來拒行德麾眾逆擊自旦
及午殊死戰廷勳大敗棄城走遂據河陽盡以府庫
分給將士因推行德知州事厲士卒繕甲兵據上游
士氣益奮人望歸之聞漢祖起自稱河陽都部署遣
弟行友由間道奉表勸進授河陽三城節度使乾祐

中加同平章事移成德軍廣順初加兼侍中改忠武軍遷河南尹西京留守時鹽禁甚嚴有關吏與僧希賞令僧從民嫗鬻蔬密寘鹽筍中嫗持入城吏擒以送府行德覺其誣釋嫗斬僧及關吏部下凜然顯德初封譙國公世宗加兼中書令令完洛陽城改封邢國節度武甯疏導甬橋東南汙洋達於泗上尋爲濠州行營都部署破淮軍二千俄屯定遠爲吳所敗五年復節度保大宋初加中書令封韓國改節忠武軍進魏國移鎮安州加開府儀同三司入爲太子太傅太平興國三年致仕卒年七十二贈太師

閻守恭并州榆次人父榮倜儻有志畧劉繼元欲召至
帳下辭不就守恭體貌奇偉劉氏平徙太原民於大
名府因僑家焉往來負販并汾間過西山聞郭進爲
都巡檢使慨然曰進不遇主亦行伍爾吾豈不及進
耶遂應募隸拱聖軍擢殿前押班咸平中從幸河北
以功爲捧日副指揮使歷拱聖龍驤衛捧日指揮使
累遷左第二軍乾州刺史明道中以德州刺史爲永
興軍兵馬鈐轄徙并代路守恭性沈勇御軍嚴雖家
居如對賓客常訪求士大夫取郭進事師法之俸祿
悉散予人在并州因春社會客曰守恭太原一貧民

爾徒步位刺史老復官鄉里踰分多矣今日與卿輩
訣後十日卒

夏守恩字君殊并州榆次人父遇武騎軍校與契丹戰
歿補守恩下班殿直給事襄王宮遷西頭供俸官真
宗初四遷至北作坊使普州刺史從幸澶淵數見任
使遷博州刺史歷龍神衛捧日天武四衛都指揮使
秦州防禦使章獻預政以守恩領親兵倚用之擢殿
前都虞候天聖初以安遠軍留後管勾殿前馬步軍
都指揮使加步軍副都指揮使威塞軍節度使爲永
定陵總管雷允恭誅徙節河陽三城歸鎮知澶相曹

三州并代路馬步軍都總管歷天雄秦甯武甯三節
度使爲真定府定州路都總管通判李參發其賊編
管連州卒

夏隨字君正守贊子慎重少過頗好儒多與士大夫游
初蔭殿侍爲率府副率仁宗初除內殿承制歷闔門
使出爲天雄軍兵馬鈐轄知衛州徙邠州累遷秦州
防禦使爲鄜延路副都總管徙懷慶復還鄜延獲元
昊僞書錦袍銀帶以遺金明李士彬隨力辨其行間
士彬感激擊賊自效轉耀州觀察使知亳州劉平敗
徙河中以父爲經畧留領會靈觀事守贊還復爲陝

西副都總管兼緣邊招討副使卒贈昭信軍節度使
諡莊恪

明

張旗永樂時知安邱縣妖賊唐賽兒攻城旗與縣丞馬
擄率民兵登城固守賊戰敗復會眾圍之值救兵至
旗出城合兵擊賊賊大敗去城獲全

張珣甄井里人素有膽畧嘉靖辛丑北寇大舉至榆次
村中男女三千餘人無堡寨可避惟珣叔張公秀宅
大且固眾爭投入以死守虜騎八百攻圍三日未已
珣率少年壯健者左右捍衛一村恃以無恐珣見虜

大營漸撤乃與族人張玠張惠並勇壯二百餘人與
虜戰斬首三級傷者甚眾虜遂引去珣等赴省獻功
撫按賞銀百五十兩仍獎之云輕生敢死能挫八百
騎之鋒仗義輸財得保三千人之命奏授珣玠等典
史以旌其功

國朝

武文煌順治初以從征授湖廣鄖陽守備陞四川忠州
遊擊

隱逸

後漢

郝子廉太原人飢不得食寒不得衣一介不取諸人曾
過姊飯留十五錢默置席下去每行飲水常投一錢
井中採風俗通補

按國名記云殷帝乙封少子於郝今太原榆次縣
有郝鄉即其處又唐郝府君碣府君出殷後以國
爲氏漢時有處士子廉劉聰河東太守翼北魏散
騎常侍軒皆名聞於世府君遠祖昭魏將軍列侯
代居榆次家世冠弁州云云則子廉與昭軒並爲

榆人明矣

五代

敬滌心五代時隱居南趙能詩精於易常謂人言某歲
真主當興天下自此大定及宋太祖龍飛與滌心所
說無不相應其年七十餘尚健能飲酒斗許不醉騎
牛行山谷間或臥石上有出俗之意滌心詩數篇張
丞相士遜家有之記一聯云水禽依釣客風葉撲龕
僧亦有幽味也

採林間錄

元

謝默篤志好學博通經籍養母以孝聞高尚其志終身

勿仕

趙彬至大間以儒士辟冀甯掾去之教授里中來從問學者百餘人

明

王屏朱東聶村人邑中文學諸生也甲申三月李自成破京師明社已屋屏朱取衣巾焚之絕意仕進或有勸之者輒張目不答盤桓山谷間以終

國朝

白翰墨中郝村人十六歲棄學爲農不汙流俗少暇則與文士談最喜吟詠所著有涂湄閒詠俗人罕有接

見者時人稱爲隱士

僑寓

戰國

荆軻者衛人也好讀書擊劍而以術說衛元君元君不能
用常客榆次與蓋聶論劍聶怒而目之荆軻出人
或言復召荆軻聶曰曩者與吾論劍吾目之是宜去
使使往之主人荆軻則已駕而去榆次矣

漢

第五倫自以久宦不達仍將家屬客河東變姓名爲王
伯齊往來太原上黨間所過輒爲糞除而去陌上號
爲道士

孟敏客居太原郭林宗勸令游學漢諸賢事狀云敏授
教中都土屋自蔽中都人敬其名德爭饋粟帛敏皆
無所受三公交辟焉敏不應命

五代

漢高祖劉知遠後改名暉本沙陀部人微時爲榆次李
氏贅壻常牧馬犯僧田僧執而笞之及爲太原節度
使召僧至使之坐而慰諭之眾心大悅

金

崔琚博陵人舉進士官明威大將軍開國男大定中寓
居榆次

元

黨志善陝西人仕元至河南中書行省元末避亂徙家於榆次東陽里子文琰博極羣書以教授為業號白雲子

明

傅山字青主陽曲高士也 國朝康熙時隱於黃冠嘗往來榆邑沙溝與王介石友善並與彌陀洞僧人了法相酬贈又時至城內大乘寺

山西通志傅山字青主陽曲人徵君山之子也五歲失母祖母負兒居撫考之七歲能為小詩十五通經史解文章遭亂侍徵居東

西馳道十年安家時或推山中置書積上休遊則假書讀之中州省吏部郎者故居士訪徵居抵署徵君令肩伴之殺與論中州文獻治不置吏部或不就居居也語朝謝徵君曰吾是漸杜即君歲甲午徵君以黃德澤大度獄中肩藉陽曲倉

一夕夢鐵錘瓦洞一柱事尋解告信居沙州客所知其才者令設鸚鵡賦援筆立草四百餘言奇氣橫溢文未竟客

戴氏杖字楓仲祁县人明戶部

員外郎遷昌子也補誦生食

甲申後舉進仕居丹楓園著

書操選政殿版十種行世一

時名滿天下學者仰之如斗

海內名流南方多聚於水繪

園北方則丹楓園稱極盛子

明庭字季子少陽諸生治與

曲傳者主祁世戴楓仲及善父遇

春宮流三學讀成長進未知柳城

與其成之書曰汝父半生死人所

不作念是更知苦難事馬切勿

喜幸兒終卿問的吾志季子自

之記庶與弟同並位居得守

木之縣元

卷九

五

曰止柳羊而羅不取拾送篇如戴楓仲其言類此樸家自擬揚謔作用時運不偶適轉地道勇生與父歷
遊無愁春榜問手執小車戴行季以為常嘗信於維陽作估客與四言果存一日徵君論及某饑寒眉曰此單並
非饑寒果了我正是我果了饑寒徵君曰此語大可讀書法真行草直追魏晉漢魏尤以獨步徵君自謂不
及也兼工繪事精筆法遠釋典內舊識詩自宋以下不該如者肩我初集不厚古不聚時騰議起手象慮休
法創由未有故曰我待楓仲老持徵君及白居定胡季子訪而以其集附焉題曰吾四人詩神四人者心同言同膽
識同命同七年五十六先徵君卒子運蘇赤驥皆以才名

仙釋

唐

空王佛者出太原榆次縣源渦里俗姓田氏名志超孩時即喜禮佛年十七削髮遊五臺有老人謂曰子後當佛矣回至介休縣西滾鐘寺夜感白兔用鐘取水日供不竭後入縣山仙窟有五龍出聽說法至抱腹巖中禪定有青衣童子奉古佛舍利供養貞觀初旱太宗禱雨不應因遣人召之使者至則曰不須西去但拜吾侍者當得雨使者如言拜之侍者方漸米以米汁向長安灑之因曰使者速去長安已霑足矣大

宗賜號空王佛已而坐化遂以所居寺爲空王寺

宋

法濟榆次縣人初禮五臺秀禪師爲師真宗天聖中臥
化縣之紫巖寺

元

印寶榆次人俗姓康戒行甚高後住持汾州法興院坐
化三日茶毘烈焰中有金光得舍利數千眼舌俱備
後有人見之於黃蘆嶺單騎西去云

陶志頤榆次人號隱真子幼學道得煉性之術究其元
妙年九十化於邑之萬春宮

文涓東祁里人姓施氏居楊方金界寺精於經懺抱道
潛真尤善大字筆畫勁逸有神

國朝

海金者榆城里人姓任氏去爲僧於延壽寺得法於天
童常刺舌血書華嚴經善大字頗工詩詞

了法師邑人住錫沙溝村長身大首形狀有異每出繫
巨囊於腰盛棗栗遇人輒勸之念佛從則喜出棗栗
不從則大罵或至批其頰人皆目之爲顛僧方建彌
陀洞時將募化十方求陽直傳徵君作疏自榆至陽
直六十里師自擔林檎百許斤以爲贄途中見念佛

者餓者老而羸者皆啖之至微君之門而盡獨枵然
二器存焉師既不以為嫌微君則大喜為作募緣說
手自寫之復贈以詩詩曰一擔秋黃結萬緣從他口
裏辨酸醎擔頭空了輕輕放莫漫矜誇滿口餐餐一作
作盞
至今其法孫嘗什襲藏之康熙五十四年邑人王象
作碑記

道士元陽子者姓喬少有道行年二十餘遊大紅山鎮
壽寺樂其幽勝有終焉之志爰募資修寺自是靜坐
其中數十年不出冬不火夜不寐以為常康熙六十
一年正月廿六日忽語其徒曰吾歸矣瞑而化

李程還道號三貞子自少性端潔寡言笑屏居一室脩然有離塵之想後遊省會以皇極數受知於鄂總戎且諧金匱方與方道長結緣一時人多尊禮之然皆非師本意也師喜靜不喜動自詣源渦施霖洞內外整潔志行高古望之若不可及而即之熙熙輒能因事導人於善年未週甲謁烏金山水晶院之牛師喜其元機超解因受度牒焉鄂公賜號曰半仙乾隆三十二年貢生原學健作記